

दिनांक 13.09.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी विकास सारु शांति ने सब ऊं जरूरी बतायी- मणिपुर रा नौजवानां ऊं कल्याण रा गेला माथे चालण री अपील कीनी
- उपमुख्यमंत्री दिया कुमारी कह्यो -प्रदेश मांय सैर-सपाटा ऊं जुड़्या और सुबीता विकसित करण सारु पांच हजार करोड़ रुपया खर्च कर्या जावेलां
- राज्य मांय बिरखा रो दौर फिलहाल रुक्यो-आतूणी हलका मांय 15 सितम्बर ऊं चौमासा री बिरखा बंद व्हेवण रा आसारं
- काल राष्ट्रीय हिन्दी दिवस मनायो जावेला-राज्यपाल हरिभाऊ बागडे हिन्दी ने तकनीक ऊं जोड़ता थकां नुवी विश्व भाषा बणावण बाबत् कह्यो

000

प्रधानमंत्री नरेन्द्र मोदी आज मिजोरम री राजधानी आइजॉल मांय विकास री नौ हजार करोड़ रुपया ऊं बत्ता खर्च री परियोजनावां रो वर्चुअल तरीका ऊं उद्घाटन कीनो अर नुवां कामां री नींव रखीं श्री मोदी आठ हजार करोड़ रुपया ऊं बत्ता खर्च वाळी बैरबी-सैरांग नुवी रेलवे लेण रो उद्घाटन कीनो, जो पहली दफा मिजोरम री राजधानी आइजॉल ने रेल सेवा ऊं जोड़ रही हैं ई मौके श्री मोदी कह्यो के इण ऊं लोगां ने हिफाजत सागे किफायती सफर रो सुबीतो मिलेलां ई सागे ई कारोबार अर सैर-सपाटा ने बधावो मिलेलां प्रधानमंत्री इण ऊं पैली मणिपुर रा चूडाचांदपुर मांय राख्यी ज्यी जनसभा मांय नौजवानां ऊं कल्याण सारु विकास रो गेलो चुणबा री अपील कीनी

.....

000

केन्द्रीय युवा कार्य अर खेल मंत्री मनसुख मांडविया कह्यो है के विकसित भारत बणावण सारु युवा संवाद जरूरी हैं वे बतायो के सवाल-जवाब री **विकसित भारत यंग लीडर्स डायलाग** होड़ आज नई दिल्ली मांय सरु व्हीं आ प्रश्नोत्तरी आवता महीना री 15 तारीख ताई चालेलां होड़ मांय **माय भारत पोर्टल** माथे जा र सिरकत करी जा सके हैं केन्द्रीय मंत्री कह्यो के संवाद रो ओ मंच विकसित भारत रो संकल्प पूरो करण मांय नौजवान प्रतिभावां री क्षमतावां ने काम लेवण सारु तैयार करी ज्यो हैं वे विद्यार्थियां अर नौजवानां ऊं ई होड़ मांय शामिल व्हेवण सारु कह्यो

.....

विकसित भारत यंग लीडर्स डायलॉग 2026 रो समापन आवता साल 10 ऊं 12 जनवरी ताई नई दिल्ली मांय व्हेलां

000

उपमुख्यमंत्री दिया कुमारी राजस्थान डोमेस्टिक ट्रैवल मार्च 2025 रा दूजा दिन आज जयपुर मांय बी2बी मीटिंग्स अर एक्सपो रो उद्घाटन कीनो अर प्रदर्शनी ने निरखीं ई मौके उपमुख्यमंत्री कह्यो के राज्य मांय सैर-सपाटा रा और सुबीता मुहैया करावण सारु विकास रा कामां माथे पांच हजार करोड़ रुपया खर्च कर्या जावेलां वे कह्यो के सैर-सपाटा राज्य री आजीविका, संस्कृति अर गर्व रो आधार हैं साल

2023 मांय 18 करोड़ देशी अर 18 लाख परदेशी सैलाणी राज्य री सैर कीनीं खबरनवीसां सागे बातचीत करता थकां दीया कुमारी कह्यो के पर्यटन अर आतिथ्य हलको लाखां लोगां ने नौकरी-धंधा रा मौका मुहैया करा रह्यो हैं उपमुख्यमंत्री कह्यो के राज्य ने दुनियाभर मांय पिछाण राखण री ठोड़ बणावणो तैय करी ज्यो हैं

000

प्रदेशभर मांय आज तीजी राष्ट्रीय लोक अदालत लगायी ज्यीं राष्ट्रीय विधिक सेवा प्राधिकरण अर राज्य विधिक सेवा प्राधिकरण री ओर ऊं राख्यी ज्यी लोक अदालतां मांय केई मामला राजीनामा ऊं निपटायी ज्यां राजस्थान हाईकोर्ट री जोधपुर अर जयपुर पीठ समेत प्रदेश री सगळी अधीनस्थ कचहरियां मांय लोक अदालत लगायी ज्यीं कुल 498 बैचां रे मार्फत ऑनलाइन अर ऑफलाइन तरीका ऊं मामलां री सुणवाई करीजीं

000

सलूमबर जिला रा साजनोत मांय पुलिस गैर-कानूनी तौर ऊं भेली करीजी करीब अढ़ाई सौ टन बजरी ज़ब्त कीनीं हैं थानाधिकारी धर्मेन्द्र सिंह वाघेला बतायो के पुलिस री टीम मौका ऊं 12 टीलां मांय भेली करी ज्यी बजरी ज़ब्त कीनीं

000

जीएसटी परिषद री ओर ऊं तीन सितम्बर ने करी ज्या कर सुधारां ऊं न्यारा-न्यारा हलकां मांय जनता ने फायदो मिल रह्यो हैं घर मांय अर रोजीना काम आवण वाळा सामान माथे जी.एस.टी. री रेट कम व्हेवण ऊं लोगां ने घणो फायदो मिलेलां खाण-पीण री केई चीजां माथे जी.एस.टी. हटा दियो ज्यो है, जद के केई चीजां माथे टैक्स री रेट कम करीजी हैं तरकारियां, फल, मेवां अर फलां रा रस माथे जीएसटी री रेट 12 ऊं घटा र 5 फीसदी कर दीरीजी है, जद के नमकीन, भुजिया अर मिक्सचर माथे ई जीएसटी री रेट घटा र 5 फीसदी कर दीरीजी हैं ई रे अलावा कैंडी, टॉफी अर जेली माथे जीएसटी री रेट 18 फीसदी ऊं घटा र 5 फीसदी कर दीरीजी हैं जयपुर रा एक किराणा कारोबारी इण ने स्वागत योग्य बतायो हैं वे कह्यो के इण ऊं त्योहारी सीज़न ऊं पैली सामान री मांग बधेलां

.....

000

राज्य मांय बिरखा रो दौर फिलहाल रुक्योड़ो हैं मौसम विभाग रे मुजब लारला चौबीस घंटा मांय केवल धौलपुर जिला रा सैंपड मांय छांटो छिड़को व्ह्यो ई रे अलावा कठे ऊं बिरखा रा समाचार नी हैं बारिश रो सिलसिलो रुक जावण ऊं केई ठोड़ां रात री बगत पारो थोड़ो उतर्यो हैं सिरोही, उदयपुर, पाली अर प्रतापगढ़ समेत केई ठोड़ां रात री बगत तापमान 23 डिग्री सेल्सियस ऊं कम रह्यो प्रदेश रा आतूणी हलकां मांय 15 सितम्बर पाछे चौमासा री बिरखा बंद व्हे जावण रा आसार है, जद के ऊगणी हलका मांय आवता दो तीन दिन ताई मौसम सूखो रेहवण री संभावना हैं ई बीचे 16 सितम्बर ऊं राज्य रा लंकाऊ-ऊगणी हलकां मांय कठे-कठे हल्की बिरखा रो अनुमान हैं प्रदेश मांय ई चौमासा मांय हाल ताई करीब 67 सेंटीमीटर बारिश व्हे गयी है, जो औसतन 40 सेंटीमीटर री डोढ़ी ऊं बत्ती हैं चोखो मेह व्हेवण ऊं राज्य रा छोटा-मोटा 693 बंधां मांय ऊं 445 लबालब है, जद के डोढ़ सौ थोड़ा घणा भर्या हैं

000

अजमेर मांय बोराज तळाव मांय बत्तो पाणी भर जावण रे कारण ज्यां लोगां ने नुकसाण व्ह्यो, वां ने विधानसभा अध्यक्ष वासुदेव देवनानी आज राहत राशि दीनीं जिला प्रशासन री सर्वे रपट रा आधार ऊं 158 पिरवारां ने मुआवज़ो दियो ज्यो कार्यक्रम रे दौरान श्री देवनानी कह्यो के गर किंण ई पिरवार रो सर्वे नी व्हे सक्यो है, तो वां री ई पिछाण कर र राहत दी जावेलां

000

भरतपुर मांय मधुमक्खी पालन री सिखावण देवण सारू आधुनिक एक्सीलेंस सेंटर खोल्यो जा रह्यो हैं ई सारू **सेवर** पंचायत समिति रा मई गुर्जर गांव मांय करीब 10 हैक्टेयर ज़मीं री पिछाण करीजी हैं म्हाणा खबरनवीस बतायो के करीब 10 करोड़ रुपया रा खर्च ऊं बणाया जावण वाळा ई सेंटर ऊं मधुमक्खी पालन ऊं जुड़्या किसानां अर नौजवानां ने सिखावण देवण, शहद प्रसंस्करण अर वितरण मांय फायदो मिलेलां

.....

000

काल राष्ट्रीय हिन्दी दिवस मणायो जावेलं हिन्दी भाषा ने हर हलका ताई पूगावण सारू ओ दिन मनायो जावे हैं ई मौके राज्यपाल हरिभाऊ बागडे वां रा संदेश मांय कह्यो के ओ दुनिया री सब ऊं चोखी भाषावां मांय ऊं एक है, जो आखी दुनिया मांय बस्योड़ा भारत रा लोगां अपणायत री डोर ऊं बांधे हैं राज्यपाल हिन्दी ने तकनीक ऊं जोड़ता थकां आधुनिक विश्व भाषा बणावण री अपील कीनीं राज्य स्तर रो हिन्दी दिवस जळसो काल जयपुर मांय राख्यो जावेलं भाषा अर पुस्तकालय विभाग रा शासन सचिव कृष्ण कुणाल बतायो के ई कार्यक्रम मांय हिन्दी रा प्रचार-प्रसार अर इण ने बधावो देवण सारू काम करण वाळां ने आठ विधावां मांय **हिन्दी सेवा पुरस्कार** दे र नवाजा जावेलं

000

आदिवासी बाहुल जिलो डूंगरपुर अब कुपोषण मुक्ति री ओर बढ़ रह्यो हैं जिला मांय साल 2019 ऊं साल 2021 रे दौरान कोई 8 फीसदी बच्चां कुपोषित हां ई साल जुलाई महीना ताई आ तादाद घट र कोई 1 फीसदी रह गयी हैं म्हाणा खबरनवीस बतायो के पोषण ट्रेकर एप रे जरिए आ आंकड़ा सामी आया हैं

.....

000